

**Date – 18/01/2026**  
**Time - 7:30 -7:40 Hrs**  
**AKASHVANI AIZAWL**

## REGIONAL NEWS BULLETIN

### HEADLINES (MORNING)

1. **India ram pum pui School zirlai naupang te pual Reading Decathlon Quiz competition Final-ah Mizoram atangin Mount Carmel School leh La Montessori School te an inlan.**
2. **Aizawl Taxi driver hrang hrangte chuan, Mizorama khualzin rawn lut te atangin tun hma aiin tun hnaiah sum an hailut nasa zawk tih an sawi.**
3. **February 12-a inthlanpui neih hma-in Bangladesh-ah hmeichhia, hmeichhe naupang sakhua leh hnam tlem zawkte laka hleihlenna a pung chho nia hriat a ni.**
4. **Chhattisgarh Bijapur district-a security force-te nena inkahnaah Maoist thi zat chu pali an tling tawh.**

<><><>

### READING DECATHLON QUIZ

**Food4Thought Foundation leh Monocept ten an buatsaih - India ram pum pui School zirlai naupang te pual Reading Decathlon Quiz competition Final-ah Mizoram atangin Mount Carmel School, Chaltrang leh La Montessori School, Mission Veng te an inlan.**

**Final hi nimin khan neih niin, Mizo nauangte hi Mizoram leh North East Zone aiawh turin Hyderabad lama kal tur an nih laiin Thlawhtheihna lamah harsatna an tawh avangin Mizoram Youth Commission Office atangin Online a competition hmachhawn mai turin dilsak an ni a, dilna hi phalsak an nih angin MYC Office atangin National Round (Final Round) hi Online hmangin an hmachhawn a ni.**

**First Round hi nikum August 22--ah khan MYC hmalaknain Online mode hmang hian MYC conference room-ah buatsaih a lo ni tawh a. Hetah hian School pali (4) an tel a. He round-ah hian North East region aiawh tur thlan an ni a. North East region aiawh tur hian Mount Carmel School leh La Montessori School te hi thlan an ni ta a ni. School pahnih te hian nikum November 29 khan Indore, Madhya Pradesh a neih Regional Round chu paltlang leh in tun dinmun National round hi an thleng a, Mount Carmel hi 2-na niin La Montessori hi 3-na an ni.**

**School pahnih atanga zirlai tel te hi in Mount Carmel School atangin zirlai pahnih Rebek Malsawmzuali leh Krista Roluahpuia Khiangte te an ni a, La montessori school atangin Malsawmhlui Pachuau leh Joshua Lalawmpuia te an ni.**

**India ram pum huap Reading Decathlon (Quiz competition) a nih avangin nasa taka inbuatsaih ngai a ni a. Zirlaite hi he inelna an hmachhawn hma hian lehkhabu chhiar tur 100 chuang pek an ni a, chung lehkhabu an chhiarte atang chuan zawhna hrang hrangte hi zawh an ni. MYC chuan zirlaite a chhuang hle**

tih an sawi a, an lawmpui bakah an kal zelna turah duhsakna sang ber an hlan a ni.



## AIZAWL TAXI

Aizawl Taxi driver hrang hrangte chuan, Mizorama khualzin rawn lut te atangin tun hma aiin tun hnaiah sum an hailut nasa zawk tih an sawi.

Akashvani News Aizawl zawhna chhangin, Ramhlun South a Taxi driver pakhat chuan, Sairanga rel a rawn luh hnuah khualzin an rawn kal tam em em tih a sawi a, chung mite chuan Taxi an hman nasat avangin tlanna tur an ngah tih a sawi bawk.

Taxi driver sawi dan chuan, khualzinte hian Reiek, Sakawrhmutuai Tlang, Hangi Lunglen Tlang leh Zoram Medical College and Hospital te chu an tlawh nasat a nih thu a sawi a, driver zingah Hindi leh English hmang thei ten rawih an hlawh zual nia sawiin, phurh tur an ngah vanglai chu nikum Krismas vuakvet kha niin, tun thla kal laiah erawh khualzin an tlahniam leh rih niin a sawi.



## Dr THANGTEA

Dampa bialtu MLA Dr R. Lalthangliana chuan Dampa bial chu Pathianin amah a dahna hmun a ni tih a hrtiatchian zel thu a sawi.

Dr R. Lalthangliana hian nimin khan a bial chhung West Phaileng veng chung, New West Phaileng leh Tuahzawl khuate a tlawh a, ni thum chungin khaw 20 vel a tlawh. MLA chuan, Dampa bial chu Pathianin amah a dahna hmun a ni tih a hriat chian zual thu a sawi a, MLA a nih takah chuan party pakhat chauh MLA ni lo, mipui MLA, mi zawng zawng ta a nih tawh thu a sawi. Helai bialah hian kut hnathawka eizawng deuh vek kan ni a, eng hi nge an eizawna tur atana tha ber tur leh inchawikanna atan tha ber ang tih bialtu MLA ho hian uluk takin an sawi ho a ni.

Dampa bialtu MLA hian West Phaileng PHC chu a tlawh nghal a, thawktuten lo dawngsawngin hospital tul leh mamawhte an lo thlen a, MLA pawhin theih ang anga puih a inhuam thu a sawi bawk. Dr.Thangtea hian Nurse pakhat krismas vuakvetah hospital-in duty an indaih loh avanga an lak belh hlawh chu a peksak nghal a, hospital poor fund atan pawisa fai a dah nghal bawk.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## PHE

Public Health Engineering (PHE) department hotute chuan thal thleng mekah mipuite tui in tur pek kawngah harsatna liantham a la thleng rih lo an ti.

Akashvani News zawhna chhangin PHE department hotute chuan tun dinhmunah Aizawl khawpui chawmtu khawl Phase I, II leh III ten tluang taka tui an pump reng thu leh heng khawlah te hian chhia emaw, tluang lo emaw a awm rih loh thu an sawi a. Tui pump tur pawh a tam thawkhat rih thu sawiin tui pawh a thianghlim that thu leh tui nu avanga harsatna tawh thin pawh

tunah chuan a awm loh thu an sawi a. Tui semtuten an duh zat an sawi ang chu an pek zel theih rih thu an sawi a, hetihrial hian an tui pekchhuahna kalkawng, pipe network la rualkhai tawk lo avangin veng thenkhat han harsa leh zeuh thin erawh a awm theih thu an sawi a ni.

PHE department hotute chuan thla thar February thla chho thleng hi chuan harsatna an tawk rih lo tura an ngaih thu sawiin kumdangah chuan March thla chho atangin tui a tlem thin an ti a. Hetah hian tui lakna hnar bulah thal tui harsatna sukiang turin tui an khuah thin thu sawiin tunah hian tuia harsatna a awm loh nan reilote atana khuap loin a ngheta Phase II tui khuahna atanga km 3-ah meter 8 vela sang tui khuahna tur ruahmanna an neih mek thu leh hei erawh hi chu hna liantham deuh anih avangin hun la duh hret tur a nih thu an sawi a ni.

Hetihlai hian Lunglei khawpui tui in tur lakna atana Tlawng Lui, Impounding Gravity Dam khuah mek chu March thla hma ngei a khuah zawh anih theih nan PHE Deptt Lunglei chuan Contractor pawh an tur chho mek zel a.

Lunglei PHED SE Pu Lalsanga chuan kumin chhungin vawi 6 a hmunah kal chilhin thal khawroa Lunglei khawpuiin tui in tur a harsatna an tawh loh nan theihtawp chhuah a ngaih thu a sawi a. January thla tira MJA leh Lunglei Dist. Consumer Assn (LDCA) ten tunkar chhung ngei a tuikhuah hnawhpinna Valve vuah tur a Contractor an ngenna angin Contractor pawhin Lui a JCB luh theih nan a panna lung khawkrawk kar a leichhun vum hna pawh an thawk zo thawkhat tawh tih sawiin Pathiannah chuan Valve vuah theih an tum tih SE chuan a sawi a ni.

Ramzotlang a lut tur Pipe lian phum hna pawh thawh mek a ni.

<><><>

## Maoist Dead

Chhattisgarh Bijapur district-a security force-te nena inkahnaah Maoist thi zat chu pali an tling tawh. Thi zingah hian hmeichhe Maoist a tel a. Security force-te chuan inkahaina hmun atangin silai pahnih an hmuchhuak tawh bawk a, chung zingah chuan AK-47 pawh a tel a ni. Bijapur Superintendent of Police, Dr. Jitendra Yadav chuan District Reserve Guard, COBRA Battalion leh Special Task Force-te joint team chuan District hmarchhak biala ramngaw leh tlangram hmuna Maoist-te awm thu an dawn hnuah zawn hna an thawk tan tih a sawi. Security force leh Maoist-te nimin zinga atanga inkap tan an ni a. Chawhnu lamah chuan Maoist pahnih ruang chu a hmunah lakchhuah a ni a, a hnuah ruang pahnih lakchhuah leh a ni bawk. Maoist pali an thi tawh a ni.

<><><>

## Human Rights Violations in Bangladesh

February 12-a inthlanpui neih hma-in Bangladesh-ah hmeichhia, hmeichhe naupang leh sakhua hnam tlem zawkte laka hleihlenna a pung chho nia hriat a ni a. Human Rights Watch group (HRW) chuan report an siamah, tuna sorkar hian an hmeichhia te leh hnam te nau zawk te venhim kawngah an hlawhchham der niin a sawi. HRW chuan sorkar chu hun rei tak atanga rawtna siam tawhte chu kalpui turin a ngen a, chung zingah chuan hmeichhiate parliament-a an aiawh tihpun te, international human rights treaty zawm te, hnam tlem zawkte tana constitutional protection vawnhim te pawh a tel a ni.

<><><>